

Pleiv Rueun Ruschein Siat Pigniu

Protocol dalla radunonza generala dils 26.04.2025 a Pigniu

Beinvegni ed appel

Allas 19.30 uras arva il president Duri Coray la radunonza. El sa beneventar 26 parochianas e parochians vuschabels.

Unanimamein decida la radunonza da schlargar la gliesta da tractandas per la tractanda 7.a) Elecziun commember/a da suprastonza.

La gliesta da tractandas ei stada publicada el fegl uffical sco era sin la pagina d'internet.

Gliesta da tractandas:

1. Elecziun dumbravuschs
2. Protocol dalla radunonza generala dils 05.06.2024 a Rueun
3. Rapport dil president
4. Rendament da quen 2024 e preventiv 2025
5. Rapport da revisiun ed approbaziun dil quen e preventiv
6. Fixar il pei da taglia per 2026
7. Elecziun da nies plevon sur Thomas Arkuszewski
- 7a. Elecziun commember/a da suprastonza
8. Orientaziun terren Sorts Sura a Rueun
9. Damonda da credit per via d'access Sorts Sura Rueun
10. Varia

1. Elecziun dumbravuschs

Susi Spescha Pigniu vegn tscharnida ed elegida unanimamein.

2. Protocol dalla radunonza generala dils 05.06.2024 a Rueun

Il protocol ei vegnius publicaus per liung temps sin la pagina d'internet. Ina prelecziun vegn buca giavischada. Il protocol vegn approbaus unanim.

3. Rapport dil president

Sco usitau rapportescha il president sur dil curriu e passau el decuors digl onn 2024. El menziunescha las votaziuns dil pievel, ordinadas dalla baselgia catolica grischuna. Ei ha dau da decider sur d'ina midada dalla constituziun dalla baselgia catolica. A tala midada ha il suveran dau suatientscha cun in ault surpli.

Plinavon dat il president enconuscent las midadas en connex cun las festivitats per reparter e regalar ils s. sacraments dalla s. creisma ed emprema s. communion. La s. creisma vegn regalada als affons dalla 5. e 6. classa mintg'auer onn a Ruschein. La s. communion vegn regalada als affons dalla 3. e 4. classa mintg'auer onn a Rueun e quei alternond cun la s. creisma. Las preparaziuns per la penetienza vegnan purschidas als affons gia en la secunda classa. Da niev senumni buca pli penetienza mobein la via dalla reconsiliaziun.

Sco adina hagien era nos edificis fitschenta la suprastonza. A Rueun, baselgia s. Andriu ha ei dau ina revisiun dalla technica vid il motor dall'ura e tuchiez. A Pigniu, baselgia s. Valentin ei stau da reparar la ligiadora vid il clutger.

Igl organist Michel Cavigelli ha obteniu la medaglia episcopala per ses nundumbreivels onns sco organist a Rueun e Siat. (Applaus).

Per concluder engrazia il president a tuts funcziunaris e gidonters da nossa cuminonza per lur engaschi.

4. Rendament da quen 2024 e preventiv 2025

La cassiera dalla pleiv ,Bettina Bertogg ha ord maldispostadat stuiu perstgisar la radunonza generala. Ord quei motiv presenta nies fiduziari Adrian Bergamin il quen da menaschi 2024, sco era la bilanza per ils 31.12.2024 ed il preventiv 2025. Il quen vegn presentaus professiunalmein, detagliadamein e capeivel.

Per ils 31.12.2024 muossa la pleiv RRSP ora ina summa da bilanza da fr.2'054'871.50.

<u>Quen da gudogn e sperdita 2024</u>	<u>preventiv 2025</u>
--	------------------------------

Total entradas	fr. 325'417.47	fr. 309'100.--
Total expensas	fr. 302'376.63	fr. 309'100.--
<u>Gudogn</u>	<u>fr. 23'040.84</u>	fr. 0.-

Dalla pusseivladat da tschentar damondas tier il quen vegn buca fatg diever, aschia ch' Adrian Bergamin siara siu rapport cun engraziar, spezialmein alla cassiera Bettina per la buna collaboraziun.

5. Rapport da revisiun ed approvaziun dil quen 2024 e preventiv 2025

Cornelia Coray prelegia il rapport dalla revisiun. Il/la revisur/a Cornelia Coray e Toni Albin han revediu il quen da menaschi 2024 che siara cun ils 31.12.2024 sco era la bilanza dils 31.12.2024. Els san attestar ch' il quen seigi menaus schuber e conform agl uorden dalla constituziun. Tut ils mussaments necessaris e pretendi, seigien avon maun.

Il/la revisur/a engrazien alla cassiera e suprastonza per la conscienciusa lavur e proponan d'approbar il quen ed aschia dar scarica a cassiera e suprastonza.

Il quen 2024 ed il preventiv 2025 vegnan approvai unanimamein.

6. Fixar il pei da taglia 2026

La suprastonza propona , da schar il pei da taglia 2026 sin 16 % dalla taglia cantunala. Ei croda neginas autras propostas. Aschia decida la radunonza unanimamein da schar il pei da taglia 2026 sin 16%.

7. Elecziun da nies plevon sur Thomas Arkuszewski

Il president declara la situaziun actuala. Il vicari general Sur Camenzind, ha appellau che la pleiv duessi eleger Sur Thomas sco plevon da nossa pleiv. Sur Thomas ei gia dapi 7 onns administratur da nossa pleiv e sto aschia onn per onn vegnir nominaus da niev dil vicari general. En cass d' in' elecziun, vegn Sur Thomas instalaus per 6 onns sco plevon da nossa pleiv.

Scrutini vegn buca pretendiu, aschia succeda l' elecziun cun maun pli.

Votaziun : Cun 19 vuschs contonscha Sur Thomas Arkuszewski igl absolut pli ed ei aschia elegius nies plevon. (Ei dat applaus)

Sur Thomas engrazia per la confidonza ed appelescha sin buna collaboraziun e bien sustegn.

7a. Elecziun commember/a da suprastonza

Deplorablamein , ord motivs da sanadat ha Martin Schnoz stuiu demissionar siu uffeci sco genau da baghetgs e schischom. La suprastonza ha tochen oz anflau negin che fuss promts da surprender la successiun da quei impurtont uffeci.

Il president engrazia a Martin per la buna lavur prestada.

Demai che negin vul schar eleger resta quei post vacant.

8. Orientaziun terren Sorts Sura a Rueun

Il president muossa , cun agid d'in plan, la situaziun e declara tgei che la vischnaunca politica Glion ha zonau entuorn en zona d' industria. Denter auter

era la parz. Sorts Sura en posses dalla pleiv s. Andriu Rueun. Actual ei quella parz. affitada sco prau d' agricultura.

Marcus Dalbert da Luven sco era Silas Roth da Sursaissa ein motivai da baghegiar sin quei terren ina resgia per commerci da lenna. Ca. ¼ da quella parz. ei sut schurmetg da muntada federala e sa aschia buca vegnir surbaghegiada. Ei setracta da schurmigiar ina collonia da miez miur e miez utschi.

Demai ch'ei setracta d'in posses ord ina fundaziun, astga la parz. buca vegnir vendida, denton dada giu en dretg da baghegiar. Il tscheins ei aunc buca definius exactamein. La suprastonza ei denton dil meini da sedrizzar tenor il tscheins che la vischnaunca politica pretenda per sulom en dretg da baghegiar. En nies cass dess quei ca. fr.20'000.- per onn.

Per dar quei sulom en dretg da baghegiar basegni **negin conclus** dalla radunonza general, ei setracta suletamein d'administrar la facultad.

9. Damonda da credit per via d'access Sorts Sura Rueun

La vischnaunca politica Ilanz/ Glion ha dumandau da baghegiar ina via d'access sin confin (miez e miez) denter la parz. dalla vischnaunca politica e la parz. dalla pleiv s. Andriu. Cuosts per la pleiv fr.29'000.-. La suprastonza ha secussegliau e propona da separticipar vid ils cuosts da quella via, denton paghein nus nossa cunpart, pér cura che nus havein deffinitiv era surbaghegiu la parzella. Croda il project cun la resgia (mira tractanda 8), ha la pleiv era buca cuosts cun la via.

Il credit da fr.30'000.- vegn concedius cun 24 vuschs persuerter e 2 vuschs resalvan.

10. Varia

Sin l'entschatta digl onn da scola 2025/26 enquera la pleiv ina catacheta ni catachet e quei demai che dunna Genelin ha demissiunau la piazza. Anflar ina persuna adattada per l'instrucziun religiosa vegn pli e pli tier ina gronda sfida.

Il plevon sur Thomas ei prompts da segidar vid l'instrucziun, denton persuls en stanza da scola culs affons vul e sa el buca esser. Las reglas da cumportament en connex cun surdiever enviers affons, laien tenor sur Thomas strusch tier quei.

Plinavon informescha il president che sin la radunonza generala 2026 enquera la pleiv in/a cassier/a ed in/a actuar/a.

Michel Cavigelli engrazia per la honoraziun. Era engrazia Michel alla suprastonza sco era a sur Thomas ed a tuttas e tuts funcziunaris per la lavur prestada. Michel beneventas, schei dess glieud che sengaschass en in cussegl pastoral.

Robert Cavigelli menziunescha che la caplutta da s. Ambrosi a Siat seigi en in miserabel stan. La caplutta s. Ambrosi vegn duvrada per caplutta da morts, ed aschia ha la vischnaunca politica Ilanz/Glion da surprendre il manteniment.

Da Siat vegn reclamau ch'els hagian giu negina s.messa sur pastgas igl onn 2025. Il president pren encunter la reclamaziun ed empermetta da far meglier igl onn proxim.

Il president siara la radunonza cun ina minuta da silenzi per il papa Franzestg ch'ei vegnius setraus oz el vatican.

Pigniu ils 26-04-2025

Il president Duri Coray

igl actuar Hubertus Spescha

